

四庫全書

集部

欽定四庫全書

集部

艮齋詩集卷

一至五

詳校官中書臣孫衡

侍讀臣孫球覆勘

總校官庶吉士臣倉聖脉

校對官主事臣張慎和

謄錄監生臣李敦源

欽定四庫全書

集部五

艮齋詩集

別集類四元

提要

臣等謹案艮齋詩集十四卷元侯克中撰克中字正卿真定人幼喪明聆羣兒誦書不終日能悉記其所授稍長習詞章自謂不學可造詣既而悔之以為刊華食實莫首于理原易以求乃為得之于是精意讀易著書名大

易通義年至九十餘而卒今通義已不傳而  
袁楠所作序尚見清容居士集中可畧見克  
中本末此乃所作詩集猶元時舊刻卷首有  
毛晉私印蓋汲古閣所藏中間律體最多而  
七言律為尤夥卷一卷二皆咏經史之作卷  
八為諧音格乃每首全以音通字異者相叶  
如一東叶同峒桐銅童二冬叶鏞庸容墉蓉  
之類凡七言三十一首五言二十一首亦克

中自創之格為古所未有其詩頗近擊壤一派多涉理路而抒情賦景之作亦時有足資諷咏者昔唐汝詢幼而失明長而能詩姑蔑一集明人詫為古所未有而不知克中已在前是亦足為是集稀傳之證又汝詢能註唐詩解而克中乃至能詁經是所學又在汝詢上矣乾隆四十三年九月恭校上

總纂官

臣紀昀  
臣陸錫熊  
臣孫士毅

總校官 臣陸費墀

欽定四庫全書

艮齋詩集卷一

元 侯克中 撰

讀易

六子相交父母純精微絜靜不沾塵經傳中古精含蘊  
畫出先天妙入神表表四千餘卦體融融三十六宮春  
清溪滴露研朱客恐是尋行數墨人

讀書

汗簡烟銷費討尋漢家訓詁滿儒林豈期萬古千秋後  
得見三王二帝心孔氏壁藏多傳會伏生口授太艱深  
考亭去取無遺恨況復門人有蔡沈

讀詩

詩緯詩經各有三大音誰為發機緘聖功昭著終三頌  
王化流行始二南毛鄭形容多草草呂蘇頭角頗蘄蘄  
不圖刪定千年後玉振金聲滿晦菴

讀周禮



庶職班班總六卿聖人布置自天成一時美意行良法  
千古遺書號太平可怪獻王增外記不堪新莽盜虛名  
誰言制度傷纖悉官府規模不厭精

讀禮記

劫火燔經亦有年曲臺彷彿記遺編誰將秦漢參周制  
我喜曾思得孔傳法度幸然存一二威儀徒爾說三千  
康成未解分經傳名物精詳亦自賢

讀春秋

西狩歸來汨滿襟麟經筆削示人深一言一字存褒貶  
真是真非盡古今二百餘年天子事億千萬世聖人心  
召陵城濮俱陳迹依舊乾坤一孔林

讀論語

聖學淵源豈易量一編魯語足輝光讀時似覺文詞易  
積久潛知意味長上知下愚終莫變朝聞夕死儘無妨  
大哉尼父參天地學者毋窺數仞牆

讀大學

赫然明命本諸天推己新民教乃宣心似鑑空方盡物  
身如山立適行權紀綱條達該精蘊節目分明有後先  
賢傳聖經潛玩久迺知一貫不虛傳

讀中庸

人道須臾未可違聖賢微旨在操持不偏不倚存誠處  
無過無虧應物時小惡遂成千里繆至公寧許一毫私  
共知百世傳鄒孟一脈春風自子思

讀孟子

上下交征逐末流力陳仁義說諸侯衍儀巧構當時禍  
楊墨深貽後世憂養氣每云無助長放心惟恐不知求  
吾儒尚有疑非論所見皆偏恐未周

易說

庖犧元不費搜尋竒自為陽耦自陰楚些吳儂皆已見  
郢書燕說豈初心伊川筆底天人備康節圖中旨趣深  
總被晦翁摸寫出朱絃三歎有遺音

易學啟蒙四首

大禹庖犧兩聖人所存所尚自超羣易傳龍馬圖中數  
範則靈龜背上文實外虛中元有體耦偏竒正豈無君  
非公善發堯夫蘊千古何由得與聞

右本圖書

太極陰陽尚混淆一生為兩四還交象儀立後成三畫  
貞悔明時備六爻須信有情皆一本斷知無物不同胞  
等閒寫出先天妙恨不同時載酒看

右原卦畫

大衍神著五十莖體惟虛一用斯行圓神方知總千變  
分掛揲歸成四營錯綜統包天地數變通曲盡鬼神情  
邇來兩背雙眉語未審何由得此名

右明著筮

讀易當明作易因玩占觀象果何人六爻進退時消長  
一氣飛潛道屈伸上下無常惟視變陰陽不測豈非神  
四千餘卦無窮事只有庖犧善寫真

右考變占

學易

庖犧作易果如何信手畫成非有他陽卦自奇陰卦耦  
治時常少亂時多乾資剛健推元化坤以安貞保太和  
不有邵圖程傳出聖人心鑑定誰磨

二氣周流貫六虛畫成奇耦法天樞百家技藝分全體  
四聖精神萃一書剖析經文輸正叔發揮圖象讓堯夫  
不知市隱成都客曾見山樵細問漁

答學者問易

索隱探微亘古今寥寥千載幾知音邵圖程傳從渠說  
義畫周經各自心時有張華方鑄劍世無鍾子莫彈琴  
不從三聖源頭看枉向諸生筆底尋

金滕

百度惟貞固不欽何憂羣叔自惱淫三壇面北求神切  
二載居東慮患深上帝動威彰聖德嗣王親逆應人心  
金滕未啟流言在禮樂安能到伯禽

爾雅



博士名官自漢初未應純是聖人書發揮五教雖無取  
訓詁羣經若有餘郭氏盛誇通豹鼠韓公竊笑註蟲魚  
九州作貢無遺憾四極為言恐涉虛

老子

一讀遺書了大綱好生毛羽惡生創華嵩不曰千陵主  
江海徒云百谷王方訝儉慈求勇廣更堪柔弱勝剛彊  
一編魯語無窮意誰謂宣尼尚伯陽

列子

金史卷一百一十五  
卷一  
舉口談天似不羣漠然五太若為分螟巢蚊睫傷浮誕  
鯤化鵬搏駭見聞詞理遠超關尹說規模不出老聃文  
人間自此還多事千古誰能解此紛

莊子

理屈詞彊本不任鄭聲猶恐亂韶音雷同老列才雖贍  
波及蘇張害更深敬長愛親咸有分絕仁棄義果何心  
六經皎皎明於日安用斯言玷古今

莊生筆底似懸河詞愈誇張理愈譌作法必由名世者

亂倫無奈異端何大椿必欲齊朝菌尺水徒勞起丈波  
一指荀存肩背失豈知方寸有中和

荀子

荀卿意欲祖宣尼立論胡為自背馳雜伯純王如有見  
議兵彊國似無知當時言性非鄒孟繼世傳心是李斯  
天理不明人事謬更將何處較醇疵

揚子

訓詁諸儒等蝟毛子雲一出破喧呶法言取次侔論語

玄贊分明體易爻獻技長楊嗟躁進失身天祿笑輕交  
區區自取千年誚枉對時人彊解嘲

文中子

朝有門生作大臣史無列傳等凡民不由正道干昏主  
敢以微言比聖人萬世遺經那可續一時私謚恐非真  
太平十二尊王策差勝揚雄獻美新

釋氏

禪分五派教三宗大道何嘗有異同男女悉歸三寶戒

乾坤不待百年空死生怖我誠堪笑因果迷人恐未公  
梁武隕身還失國可憐虛費護持功

太玄

詞意艱深理亦精截然圖象似丁寧遠希經世雖霄壤  
僅與潛虛作戶庭蹤跡本來宗禹範規模到底出羲經  
以三為用終無體有影誰能不具形

七易

聖遠言湮失正傳老來多幸得蹄筌元嵩未必能知易

金史卷一百一十五  
卷一  
君實何須更擬玄體四豈惟元統世數三不過地承天  
紛紛衆說誰分別且讓文饒筆似椽

參同契

常笑楊朱為己忙六經今古日爭光氣為所役心為主  
操則常存舍則亡八卦方能成大化五行安得作純陽  
居仁由義平生了老盡天年亦不妨

八陣圖說

魚復圖成世絕倫設疑補闕在遊軍蛇從虎翼龍兼鳥

風次天衡地附雲迷陣馬隆十七贊握奇風后一篇文  
比來熟玩西山說千古英雄所未聞

地軸天衡各有衝前為虎翼後飛龍翱翔雲勢形如鳥  
圍繞蛇蟠性似風孫武不謀符大易孔明有志躡高蹤  
彌牟魚復成都市三者誰能較異同

艮齋詩集卷一



欽定四庫全書

艮齋詩集卷二

元 侯克中 撰

堯

文思欽明四美全龍飛九五應純乾民懷帝德終千古  
聖筆虞書第一篇隨物生成惟體道與民休戚更同天  
執中豈是丹朱任只許重華得正傳

舜

歷山雷澤復河濱非舜誰能處此身孝瞽慈均全父子  
事堯讓禹盡君臣四門既闢羣亮去五教惟寬百姓親  
莫怪古今疑未信聖人所以異常人

夏

君讓臣辭悉至公此身雖異此心同民憂洪水巢林表  
天錫神龜自洛中但以啟賢承大統豈知桀虐廢前功  
祖宗創業多艱苦未見兒孫克有終

商

成湯放桀尚包羞豈料商辛在後頭方訝雉飛升祭鼎  
俄聞魚躍入王舟九重自謂為君長四海皆如疾寇讎  
不是武王容不得三分天下二分周

周

鉅橋積粟鹿臺金散向人間德澤深倒載干戈銷耒耜  
立收牛馬放山林範疇自合詢箕子禮樂何須賜伯禽  
八百餘年文武業可憐終快虎狼心

秦

卷二  
力掃羣雄廢赧王轉頭呂政代莊襄宮中自笑鹿為馬  
天下誰憐狼牧羊方羨豐碑磨碣石不知劫火到阿房  
百年枉作千年計萬世何期二世亡

漢

入關約法得人情素服興師欲正名代邸歸來生意溥  
茂陵老去悔心萌中興事業推文叔末造艱難賴孔明  
霸自有餘王不足區區魏晉敢爭衡

魏

天運循環不可逃  
小人奸險亦徒勞  
金刀未許全歸魏  
石馬先書大討曹  
羿莽罪盈滄海濶  
伊周名壓太山高  
城狐社鼠休誇巧  
無限蒼鷹未解條

晉

典午機深禍亦深  
馬頭牛尾日相尋  
託身建業雖天限  
回首神州已陸沈  
元海不臣為亂首  
奴有國是甘心  
建興已後皆非晉  
何事新亭泪滿襟

南北朝

宋興齊霸總權臣惆悵宣城又夕曛同泰舍身何可恃  
後庭遺曲不堪聞掃除釋氏輸元魏摹倣周官笑宇文  
始末不知誰授受欲書統緒竟無君

隋

江北江南總戰場一時民物萃開皇九重鳳闕秦關壯  
萬里龍舟汴水長誰遣張衡留大寶天教化及隱蕭牆  
儉人豈得專華夏除掃乾坤待有唐

唐

楊葉凋零李樹穠義旗一舉滅羣雄江河不洗滔天罪  
海嶽難酬蓋世功甘露怒流朝士血荔枝香染驛塵紅  
晉陽智術臨湖勇女禍閹權卽此風

五代

誰料朱三起禍端獨憐李二作伶官販夫亦得王藩鎮  
中國何疑祖契丹守節惟聞貞婦死迎降反作重臣看  
堂堂周末賢君相梟獍羣中見孔鸞

宋

五季惟周覺最賢陳橋一夕宋山川得從寡婦孤兒處  
失向庸人孺子邊前後共成十六主東南分據百餘年  
愛民養士雖堪尚畏敵親讐亦可憐

漢高祖

芟夷暴楚滅彊秦約法猶能暫假仁信越有功終見殺  
綺園無自肯稱臣每因納諫稱明主幾為分羹作罪人  
無黨無偏王者事只除湯武得丘民

武帝



不向江都起仲舒却從狗監召相如十洲三島非常道  
萬戶千門豈廣居海上謾勞求馬使宮中徒隱飯牛書  
老來肯下輪臺詔猶勝秦皇載鮑車

漢郊祀志

入海童男竟不還漢家宮殿盡齋壇帛書遽忍開牛腹  
紫禁空傳食馬肝曉取露華和玉屑夜調火候養金丹  
一從五利文成死漸覺求仙興味闌

光武

高皇大度可同符石勒何人敢並驅天命已知歸赤伏  
世情猶怪慕金吾宮中嫡庶疑非道泉下忠良似不辜  
咄咄子陵真有見富春耕釣豈狂奴

獻帝

命在權臣掌握間洛陽焚蕩又長安中材必得扶持易  
貞疾情知救療難亂首自來譏董卓禍胎畢竟罪曹瞞  
溫公議論文公筆留與高明後世看

晉惠帝

四葉儉謀到永熙成難壞易亦堪悲椒房未免吞金屑  
茅屋那能食肉糜牛禍已知興叛亂蛙聲何必限公私  
秋風思子臺邊泪先帝曾言是汝兒

隋煬帝

張衡入侍帝升遐罪惡宣華過麗華三閣不容歌玉樹  
六宮還許幸瓊花后妃共駭悲頭頸驍果同謀奮爪牙  
天網似踈元至密禍機終自宇文家

唐臨淄王定韋氏亂

鳳閣鸞臺未正名斜封墨勅已公行腹心致疾由安樂  
骨肉相殘自太平魑魅迭興天宇暗鯨鯢戮盡海濤清  
時人莫訝三郎勇見說楊家女已生

玄宗

老盡開元柱石臣轉頭天寶一番新祿兒出入稱皇嗣  
妃子歸來號太真芍藥勝開三月宴海棠獨得六宮春  
馬蹄蹴踏殘紅盡此日君王不敢嗔

感玄宗夢玄元事

集賢宴罷氣如虹底事玄元遂感通天下未聞求傳說  
枕中安得見周公乘輿道路連雲險禁苑繁華掃地空  
祈福不應翻取禍寶山符瑞果何功

感唐史事

閹宦當朝百不堪彊藩在外恣饕貪一從羯鼓興河朔  
幾度鸞輿幸劍南宰相未須譏鄭五帝王不久到朱三  
雲翻雨覆成何事只與漁樵作笑談

玉清昭應宮災

琳宮一夕雨中災烈焰燒空走迅雷三月阿房猶見火  
五更昭應已成灰范雍奏對言方切莊獻經營意始回  
一自定陵深閉後更無符瑞自天來

宋高宗二首

檣櫟凡材作棟梁中興事勢已膏肓無厭割地盟雖定  
不共戴天讎可忘版築已虛商說夢諒陰仍短漢文喪  
榻前何止容人睡喪斧甘心巽下牀

龍樓久廢問寒暄罔極深恩未易諼四海一心伸大義

九重獨斷割中原夫差詎肯忘君辱  
嵇紹安能洗父冤  
屈膝請和姦計就禮經從此是空言

艮齋詩集卷二



欽定四庫全書

艮齋詩集卷三

元 侯克中 撰

伯夷傳

顏子知非肯復行伯夷惡惡豈容情服膺弗失終身樂  
食蕨能全蓋世名雖死不亡仁者壽舍生取義聖之清  
二賢閭域人誰到只有宣尼集大成

弔屈原

懷裏為主子蘭卿何必逢人話獨醒長恨忠良多坎珂  
頗傷辭語太丁寧致君自合宗三代作法誰能過六經  
千載英魂招不得楚江如練楚山青

呂不韋

七國紛紛走戰塵是非顛倒亂天真老商正欲居奇貨  
太子適來求美人穢德豈宜稱仲父狡謀殊不鑒春申  
利之為物誠何物解買嬴秦作呂秦

項羽

破釜沈舟北渡河英雄到此頓消磨  
入關不解除秦法失路徒勞怨楚歌  
敵國豈專韓信勇謀臣惟一范增多  
子嬰見殺懷王死却歎虞兮奈若何

張子房

眼空寧顧虎狼秦博浪沙中義已伸  
才大儘消韓國恥功高不作漢廷臣  
少從黃石能無我老伴赤松知有身  
獨坐掩書還悵快寥寥千古更何人

欲雪韓仇快所思自知舍漢復何之  
百年身退天之道

三寸舌為帝者師借箸前籌銷印日坐沙偶語論封時  
朝臣方訝歸休早布越俄聞繫有司

董仲舒

上方用武定羌夷儒者宜為衆所擠大匠謾持脩月斧  
拙工先立倚天梯身為當代斯文主名與南山北斗齊  
許大闕廷無著處江都才了又膠西

霍光

質美材疎亦少文終將大事付元勛託孤有效今猶著

殺后求全古未聞事覺便當誅霍顯家亡安得貴成君  
撥灰取火皆公力漢室重炎惜自焚

二疏

太子凡庸衆所知浩然歸志復奚疑齊宣尚不留鄒孟  
魯繆安能養子思亂兆國家全盛日禍萌禮貌未衰時  
人生大節行藏了二老當為百世師

王莽

少行謙謹衆咸稱將謂終全孝弟名掘地無成猶棄井

履霜不已至堅冰忍傾王室為新室敢把阿衡比宰衡  
慚愧洛陽諸父老歡呼復覩漢中興

嚴子陵

羊裘野老鬢如蓬闊步長趨入漢宮伸足豈期驕萬乘  
掉頭殊不顧三公治平天下非無術格正君心儘有功  
一片釣臺高幾許乾坤無處著清風

鄧禹

破敵安民舉可稱入關何事若無能不收盆子憑三輔

坐視樊崇壞五陵絕食自難全上策披圖誰料果中興  
君臨四海人臣了功冠雲臺豈未應

諸葛孔明

龍卧重淵不厭深草廬一論定浮沈輝光前後出師表  
膾炙古今梁父吟管樂權謀年少志伊周事業老來心  
錦官城外森森柏千載清風播令音

石崇

金谷繁華日日春錦為步幃蠟為薪綠珠一死無遺恨

白首同歸有故人到此豈如居甕牖從前可惜拜車塵  
吾儕只合遵名教陽虎從他自不仁

陶淵明

彭澤幡然便挂冠老懷還比向來寬興隨綠蟻凌秋色  
心與黃華共歲寒述酒一篇知己少折腰五斗向人難  
無弦琴裏無窮趣不為時人取次彈

滄海橫流懶問津歸來博得自由身有田不肯栽秔稻  
漉酒何妨解葛巾身外一毫皆長物世間萬事等微塵



寧為黃菊籬邊客不作白蓮社裏人

九日懷淵明

苦節清才素所長  
千年有客過柴桑  
五株綠柳門闌貴  
三徑黃花姓字香  
老去惟書宋甲子  
歸來獨擅晉文章  
南山正在悠然處  
聊為西風舉一觴

張柬之定武氏亂

孟將八袞氣橫秋  
決策興唐廢偽周  
謁闕未聲諸武罪  
斬關先取二張頭  
龍韜虎畧須臾定  
鳳閣鸞臺取次休

留得三思元惡在相君寧免死新州

濂溪周子

教弛經殘失所宗先生一起破羣蒙圖書往聖前賢後  
人物光風霽月中道妙無窮庭草綠心香不斷渚蓮紅  
千年伊洛淵源盛總是濂溪一脈功

邵子無名公傳

夷未能和惠未清如公端合號無名天人一貫用而體  
心迹兩忘安且成醉裏乾坤元廣大空中樓閣更高明

陽奇陰耦此兒事說盡天機與物情

藜羹布被了生涯隨分人間玩物華老去幾時曾廢酒  
春來無日不看花乾坤擊壤三千首風月行窩十二家  
心學有源窮未得且容張祝泛靈槎

康節墓誌

公自蘇門至洛川天津精舍水南田畫圖既別方圓體  
觀物仍分內外篇千古河山風土厚一時人物主賓賢  
自慚未得先生趣空抱遺經二十年

王安石

天變人言豈易欺祖宗不法欲何為  
木離規矩徒誇巧病入膏肓反忌醫  
千古宣仁皇后傳一時元祐黨人碑  
宋亡畢竟從君始配享文宣恐未宜

題韓蘄王世忠卷後

砥柱中流障怒濤折衝千里獨賢勞  
馬頭斧鉞丁年盛驢背湖山晚節高  
風虎雲龍機易失城狐社鼠罪難逃  
區區苟活偷安輩泉下相逢愧爾曹

題池州倅趙忠毅漢卿死節卷後

半生佩蕙復紉蘭一夕芳馨滿世間  
臣報主恩今尚少婦從夫死古尤難  
一門大節傳青史千載高名等太山  
欲向長江問心事悠悠東注水聲寒

題陸君實死節卷後

宣公苗裔有餘馨耿耿丹心醉六經  
獨力生難扶社稷全家死不負朝廷  
世間民聽猶天聽海底台星拱帝星  
歲月不消忠義氣崖山十倍向時青

艮齋詩集卷三

欽定四庫全書

艮齋詩集卷四

元 侯克中 撰

冬至

一氣凝然本混沌陽升陰降互為根  
自強不息天行健德合無疆地勢坤  
夏至姤成冬至復南冥鵬是北冥鷗  
人間不有義經在千古誰開道義門

五十

五十無聞只自憐塊然癡坐誦遺編恥逢伯玉知非日  
況值宣尼學易年紙上權衡先審諦胸中規矩自方員  
克治存養惟求己禍福窮通一聽天

客有是異端而非正學者為賦此

曲徑偏蹊亂似麻出門忘返不知家卧龍盡日藏頭角  
跛鼈乘時眩爪牙澗柏巖松千載樹野桃山杏一春花  
歲寒然後存公論枉對鶯鶯燕燕誇

姚左丞席上談釋老



為仁非易亦非難  
心廣應知體自胖  
克己要從偏處克  
觀天須向靜中觀  
巍巍聖道明三極  
藹藹吾心具四端  
大命赫然人莫守  
古今宜被二家瞞

靜中

寂寂虛齋晝掩門  
靜中消息若雷奔  
白駒自逐陰陽變  
玄牝豈非天地根  
須信復來將有泰  
安知剝盡已無坤  
高情千古堯夫老  
恨不同時與細論

感興二首

乾坤生物本無私暑雨祁寒尚怨咨緯地經天惟有易  
移風易俗豈無詩堂堂張也非吾友穆穆文王真我師  
坡老不知緣底事却將秋水洗茅茨

駸駸讀盡世間書勘破先天太極圖千載愛蓮周茂叔  
一生觀物邵堯夫屈信相感心無累敬義兼行德不孤  
莫買扁舟作歸計市廛初不異江湖

感事二首

往聖遺經自古今探微索隱費搜尋格通物理知天理

克盡私心見道心  
惠子自宜貪腐鼠  
鄒公元不受兼金  
反求屋漏終無愧  
何事風波萬丈深

真是真非豈易論  
誰教涇渭各清渾  
風波始信生平地  
日月終須照覆盆  
潁水幾人曾洗耳  
楚江千古謾招魂  
何時細語梅花底  
滿意春風酒一尊

動靜

昭然動靜兩相因  
枯木寒灰恐失真  
太極圖中觀二氣  
渾天儀上看三辰  
神龍尚且隨潛見  
尺蠖安能免屈伸

地坼水冰寒正爾九原無處不陽春

為政

欲知為政果何如私意纔萌便掃除  
妍醜豈能逃藻鑑塵埃初不到冰壺  
日間接物常持敬夜後潛心細玩書  
平旦氣清還致用不須更下別工夫

持敬

皎皎靈臺瑩月華肯容尺霧寸雲遮  
片言不善違千里一敬無欺勝百邪  
果向胸中存七竅任教天外走雷車

盤盂見說剛難剝不曰人間有莫耶

天

體極高明用極圓動時發育靜時專乾乾不息惟行健  
昊昊無私只自然人道固宜通且正物情毋怪塞而偏  
古今誰解畫前易虧殺堯夫說後先

地

旁薄中天體勢斜四維蠻貊拱中華江淮河漢通山嶽  
城郭溝池固國家內直外方形有限動開靜翕用無涯

至哉坤道安貞吉一動才先五氣差

人

一點靈臺備五常九疇洪範盡三綱人皆可以為堯舜  
物不能齊任老莊粟麥未登同秕稗詩書有味勝膏粱  
吾儒必欲參天地終日乾乾要自強

述教

好名專利已為貪學佛求僊更可慙萬物固殊原有一  
兆民雖衆教無三法皆空相非真見道本無為是贅談

覆載生成天地了聖人不作定誰參

東坡為子過書金光明經卷後有感而作

說有談空似可聽筆端浩浩瀉滄溟既能若彼崇三寶  
未審如何處六經就使如來超法界不應尼父困天刑  
區區教子心雖切絕異當年鯉過庭

感興二首

學海汪洋萃百川豈如潢潦竟無源蟠胸能了五千卷  
倚馬何難數萬言秕粟豈宜升俎豆虛車奚用飾輪轅

反身無愧生平了一任嗷嗷衆口喧

暮史朝經亦有年豈知飢飽與寒暄  
禮儀未究三千品  
精一空傳十六言  
大易始乾兼動靜  
連山首艮總貞元  
陰陽慎勿輕  
先後體用由來是一原

排空

真要長存妄要無豈容真妄一齊除  
鬼神未必昧常理  
天地不能空  
太虛注意六經當自得  
蟠胃萬卷果何書  
窮高極遠終忘返  
不信人間有廣居



知止

一編大學有餘師心定神全不妄思求止自宜從至善  
問公吾欲對無私穀當秀實登場後瓜到甘香落蒂時  
百尺竿頭誇進步不知學者欲何之

人道

人生不學欲如何璞玉猶能聽琢磨共笑劉琨乘夜舞  
獨憐墨子避朝歌忍將騏驥隨驚馬儘說鉛刀勝太阿  
往聖已嘗存大訓後來寧不賴餘波

任分

懶向山林滅性情  
厭從朝市覓功名  
千鈞勁弩容虛發  
九折危塗敢妄行  
富不可求從所好  
義然後取復何爭  
詩書滿架無窮樂  
造物於人亦未輕

靜坐

皎皎冰壺月色寒  
豈容一物在其間  
了無俗事相縈擾  
中有真人自往還  
心定不妨居鬧市  
坐馳安用住空山  
龍騰虎躍須臾了  
天宇寥寥萬象閑

勉吏員讀書

為矢為函亦偶然病根一入老難痊  
斡旋赤螳縱橫陣把握青蠅黑白權  
鴟鵂豈宜藏藥籠申韓元不到經筵  
寬平易簡唐虞治且許皋陶得正傳

戒酒

一介微軀幸粗安忍令狂藥恣戕殘  
伯倫至死無遺恨康節平生不盡歡  
舌上有刀招禍易胸中無鑑責人難  
老來慎勿逢朱粲糟彘徒能奉一餐

嘉訓

嘉訓嘉謀豈在多惟精惟一外無他射鼷未要操彊弩  
斬馬終當倚太阿賴有簡書開聖蘊不須杯酒發天和  
茁然生意春長好助長握苗將奈何

彈指

彈指聲中過百年窮通壽夭豈非天熊魚尚不能兼有  
齒角何由得兩全自笑莊生誇盜跖誰憐夫子哭顏淵  
額頭肉薄臀邊厚濁富清貧豈偶然

否泰

否泰相乘理自然羽蟲常得氣之先世衰尼父書鸛鵒  
歲晚堯夫歎杜鵑賢聖立心無不盡乾坤生物未嘗偏  
欲窮藏往知來事須識庖犧未畫前

閒吟

蓬華深居絕市喧詩書滿架對晴軒商周革命三千國  
舜禹傳心十六言逐末者多誰務本汭流而上獨窮源  
若言莊叟尊尼父即是揚雄美屈原

偶成二首

智者深藏夜壑舟，豈知鵲巧不如鳩。  
唐虞至聖傳中道，桀紂甘心處下流。  
覺夢自爭蕉葉鹿，古今誰造棘端猴。  
黃精鈎吻形相肖，珍重良醫子細收。

挿架將收萬卷書，尚憐衰朽腹空虛。  
多才多藝我何有，老圃老農吾不如。  
莊叟自誇東海鼉，任公儘釣渤海魚。  
道明義正忘功利，百世當尊董仲舒。

春前一日

陽息陰消歲又窮  
易窮則變變方通  
泰亨固合明升降  
艮止何由限  
始終河漢一時隨  
北斗闕山明日屬  
東風  
春盤臘酒母相尚  
麟閣雲臺各自功

感事

杜史陶經儘有條  
顛文倒字彊為妖  
畫蛇未竟徒安足  
救旱無功反握苗  
玉振金聲周雅頌  
鳳儀獸舞舜簫韶  
許由有耳休嗔洗  
我亦臨風厭此瓢

患失

患失嘗為鐵戶樞藏舟夜壑竟何如才從龍斷征商了  
又向蟠間乞祭餘白壁任他酬管籥黃金容我貴詩書  
朝榮暮悴恒相繼可惜無人鑒覆車

萬類

萬類參差豈易齊枉將人品限雲泥兩朝並相韓忠獻  
千載幾人金日磾此際既能重搏虎來年未必不攘雞  
內剛外險終成訟水自東行天自西

自警



多病形骸百不任掩書孤坐動微吟精誠許國能完璧  
中正同人果斷金太甲三篇伊尹志出師兩表孔明心  
自甘與物俱衰朽何用尊前較古今

時有不言不笑者人以為賢迺賦

見說熊魚未易兼聖門取舍極精嚴盛稱陋巷顏淵德  
深貶於陵仲子廉有得自當如虎變不才安用學龜潛  
勿言正欲防非禮豈使人人口盡箱

為闕邪說賦

洙泗淵源未易窺聖賢出處豈難知區區李觀非鄒孟  
錄錄王充毀仲尼上下七篇仁義府古今六籍帝王師  
堂堂吾道參天地撼樹蚍蜉亦可悲

造物

造物權衡界限嚴豈容巧力得抽添鶴長未要憂鳬短  
荼苦安知有蜜甜黃葉聲乾風透戶碧梧陰重月窺簾  
人生莫謂非天命烏黑由來不日黔

評詩二首

九經能得幾何字千載不知多少詩上帝生才雖有異  
先王作樂本無私典墳已降聞商頌風雅兼亡到楚辭  
今日既非前日是昔人當作後人師

好句真如得好官善觀海者必觀瀾批風切月將求異  
流水行雲本不難武庫大開森利器化機常轉得神丹  
乾坤若謂多清氣千載誰登子美壇

艮齋詩集卷四

欽定四庫全書

艮齋詩集卷五

元 侯克中 撰

史丞相拜開府

貌虎軍中擁將壇  
鳳凰池上侍金鑾  
三分功業歸諸葛  
兩晉風流屬謝安  
開府威儀今日見  
凌烟圖畫後來看  
從教桃李爭春色  
留著松筠傲歲寒

送河南崔宣慰赴軍前

膽畧平兼將相權諫行言聽得君專寇恂只合留河內  
黃霸終當起潁川天際夕陽明遠樹馬頭春意動歸鞭  
此回宣慰江淮了四海蒼生望息肩

寄飛卿高叅政

白壁輕投反見疑刻舟求劍一何癡垂垂素髮催人老  
耿耿丹心敢自欺千古是非無處問六經模楷有餘師  
巖巖節彼南山下應被高明笑此詩

病後汴梁寄湖南崔左丞

蹤跡蹉跎愧轉蓬  
生涯寥落業屠龍  
飄飄爭羨雲間鵠  
鬱鬱誰憐澗底松  
兩地異鄉千里月  
五更殘夢一聲鐘  
天明細問衡陽鴈  
相去關山又幾重

賈統軍席間

燕趙春寒草未芽  
襄陽城下見桃花  
主人勤厚方投轄  
遊子飄零久憶家  
千里歸心隨過鴈  
四更清夢入悲笳  
溶溶二月澄江靜  
好借春風送客槎

止崔左丞入廣

青雲人物氣橫秋  
功業熏天正黑頭  
當路豺狼真可畏  
螫人蜂蠆不須憂  
喬松傲雪三冬好  
蔓草經霜一夕休  
此去相君當介意  
湖南得失在潭州

留別崔左丞

握手臨風話肺肝  
煦人春意不知寒  
處身似涉千尋浪  
舉足如升百尺竿  
誰謂書生成事少  
自知花樣入時難  
此來厚德無他報  
時遣飛鴻一問安

寄賈叅政



我居汴水子江東子向荆湖我溯中千里謾傳魚鴈信  
半生長恨馬牛風將來英物寧無種老去新詩愈有功  
四月揚州紅藥好擬拚一醉與君同

寄飛卿高叅政

自古人間行路難壽陵況復學邯鄲杏桃艷艷爭春色  
松柏森森傲歲寒白髮等閒催我老朱絃疏越向誰彈  
何時把臂傾尊酒燈火西窓語夜闌

送劉大使按察浙東時年七十

分寵南來按浙東，幾人矍鑠得如公。  
狗偷鼠竊林梢露，吏稱民安草上風。  
少日未能酬壯志，暮年正好立奇功。  
七旬便欲投閒去，笑殺磻溪把釣翁。

寄叔文崔中丞

盜賊常憎月有光，從知良賈必深藏。  
傳聞市虎猶堪畏，察見淵魚恐不祥。  
萬朶秋蓮空自老，一枝寒菊為誰香。  
朝來點檢閒風景，鶴在深林鷺在梁。

許獻臣經歷拜監察御史

暮史朝經樂未厭居官行已足撝謙二龍題品千年監  
四岳規模一行廉蓮幕風生方晝永柏臺霜落忽秋嚴  
豺狼滿路君須問細務何煩較米鹽

寄王國用總管

十月收君六月書呼兒讀罷重踟躕老懷久已塵生研  
短髮新來雪滿梳四海幾人同鮑叔五湖千古一陶朱  
故園晚景桑榆樂浙水吳山恐不如

雷苦齋致仕後以詩招之

好在江南第一州山川民物足風流故人湖上方停櫂  
客子天涯正倚樓魯縞不穿彊弩未橐砧當賦大刀頭  
知君平日多清興莫為梅花苦滯留

寄李敬甫總管

忽聞君至自惟揚立馬尋舟已去杭嗟我所行如是拙  
惜君常帶許多忙竹西歌吹三春好湖上風烟六月涼  
因使勿慳題數字故人誰最不相忘

寄賈叅政

造物驅人豈自由肯容騎鶴上揚州心如梅子徒酸楚  
身似楊花任去留愧我無家長作客羨君有嗣已封侯  
佳辰不與瓊華宴高詠新詩獨倚樓

再招雷苦齋

吾子平生苦愛人令人頃刻未忘君鷓鴣既已為忠告  
杜宇胡然不樂聞十載幾回能聚首一尊何日重論文  
闌干倚遍殘陽下滿樹歸鴉叫暮雲

送冀正父

龐眉書客髯如絲邂逅吳門識紫芝規矩在心元不謬  
權衡到手了無疑金牛正要庖丁解良馬仍煩伯樂推  
松柏凜然霜雪操賞音何待歲寒知

寄王國用簽省

剝啄聲中夜未央起來顛倒失衣裳衡門愧我栖遲久  
驛路憐君去住忙兩地異鄉容易感一燈情話最難忘  
扁舟指日西湖上共醉秋蓮十里香

寄徐中丞子方二首

學海汪洋萃衆流  
早年名姓冠龍頭  
星輝北極三台曉  
霜落南臺萬象秋  
天上麒麟符治世  
人中騏驎眇齊州  
何時卷却經綸手  
同向滄浪把釣鉤

五載分攜憶汴京  
慨然詩酒話平生  
蠹魚擬向書中老  
威鳳俄聞海上鳴  
物有短長從尺度  
事無輕重任權衡  
畏塗九折連雲險  
見說王尊掉臂行

白敬甫經歷有閩中之行

里巷親情未易疎  
豈期歲晚別中吳  
天衢自昔搏鵬翼

家道于今有鳳雛尊俎只宜終日戒詩書不可片時無  
洪勲大業他年了重繪香山九老圖

予客姑蘇王御史持李鵬舉書至知檢討太常以  
詩答之

故人北去寂無聞珍翰南來意甚勤貪慕癡蠅鑽故紙  
不知老鵠上層雲魚鹽江浙君憐我仕宦京師我念君  
歸計儻如前日約漢陽風月許平分

他日劉牧之回持李鵬舉書并所和詩見寄復用



前韻答之

心聲灑灑快吾聞手畢諄諄愧爾勤  
過隙白駒催短景出門蒼狗變浮雲  
平生顧我多知己到處逢人只問君  
一樣老懷難具述兩鄉明月解中分

胡紹闓提刑浙西以疾求去

良賈深藏實若虛埋輪清節勝登車  
九重夢寐思三老四海衣冠仰二疏  
走狗儘追東郭兔剖蝸難釣北溟魚  
知君此去無他志要讀山中滿架書

寄徐中丞子方

虛室寥寥紙帳深起來欹枕聽幽禽一杯謾記別時語  
千里空嗟病後吟裊裊爐烟羈旅恨蕭蕭髣髴故人  
心春風何日梅花底細嚼幽香酒滿斟

寄劉牧之霍清甫二廉訪

邂逅三人若有期相親相愛豈相違夜深燈影聯鑪過  
春滿湖光帶酒歸老驥謾懷千里志大鵬獨傍九霄飛  
別來莫怪音書絕客舍蕭條鴈亦稀

三月三日對緋桃寄呈雪谿紫山二按察

春意闌珊雨意濃  
山陰脩竹怨東風  
莫辭芳酒盈尊綠  
忍負夭桃滿樹紅  
曲水引詩思  
東哲洛濱合宴憶裴公  
醉鄉深處無何有  
省與時人彊異同

王宣慰有廢棋讀書之志喜而為之賦

乾坤造化筆頭生  
絕勝閒窓辟剝聲  
夫子大成猶遠慮  
奕秋小數欲常贏  
六經自合終身樂  
一著何須拚死爭  
拋却異途由正道  
恰如離亂變升平

徐廉訪寄西湖雜詩因答之

江淮襟量雪霜姿曾折蟾宮第一枝  
北闕萬言金馬賦西湖千首錦囊詩  
大奸猖熾從常憲細務紛紜付有司  
暇日朋來還對酒此時不醉復何時

贈義總統

內師尼父外如來不許庸人取次猜  
塵土掃清心地廣葛藤斫盡性天開  
萬松有子皆堪種五柳惟君獨肯栽  
竹破虛空無箇事月明依舊照靈臺

寄雷學士彥正

十年蹤跡寄江湖  
霜樹風枝半夜烏  
喪貝我非前日有  
盍簪君念故人無  
市金白晝從渠攫  
櫝玉清時待價沽  
百萬呼盧纔一擲  
此情當付牧猪奴

寄劉簽事牧之郭運副邦彥二首

樓上春寒暮靄深  
豈期佳客共相尋  
蒲鞭示辱文饒德  
寶劒衝天元振心  
知己二賢雙白壁  
克家一子萬黃金  
高山流水非難和  
明月清風是賞音

詩書滿架未為貧  
潤屋何如潤此身  
有命在天非在我  
為仁由己豈由人  
籃輿擬賦陶元亮  
錦幃徒誇石季倫  
漁父不知臺閣貴  
五湖佳處掌絲綸

史右丞退居吳山讀書

山瞰江湖市繞山  
相君高處宴衣冠  
驚濤洶湧風雷壯  
怪石巉巖劒戟寒  
今古炎涼閒裏覺  
聖賢出處靜中看  
六經自有無窮樂  
絲竹何須浼謝安

寄賈叅政


楚水吳山限大江不堪多病困南邦  
燭留夜色明空壁  
雨送秋聲入破窓  
磊落似君今有幾  
飄零如我古無雙  
暮年猶為兒孫計  
鴻鵠高林愧老龐

梁貢甫以天官再使交趾回題卷後

蘭省驅馳筆硯中已知不與衆人同  
累專名郡王陽政  
兩使遐方陸賈功  
晚境日親萱草綠  
曉窓時夢木蓮紅  
至今使者經行處  
猶問當時吏部公

寄京口卜彥才府判

家事匆匆官事繁詩書肯放片時閒當年嗟我髯方白  
今日憐君鬢已斑千里好風來鐵甕一江明月浸金山  
相看同是天涯客回首燕然似夢間



艮齋詩集卷五



欽定四庫全書

集部

艮齋詩集卷六至九

詳校官中書臣孫衡

侍讀臣孫球覆勘

總校官庶吉士臣倉聖脉

校對官主事臣張慎和

謄錄監生臣李敦源

欽定四庫全書

良齋詩集卷六

挽史丞相開府

元 侯克中 撰

早驅貔虎定封疆  
晚握樞機坐廟堂  
名重一時羊叔子  
功高千古郭汾陽  
歷朝事業麒麟畫  
遺表精誠日月光  
義膽忠魂何處見  
太行山色鬱蒼蒼

挽姚左轄雪齋

深探理窟得心傳洞徹先天與後天事去一身還太極  
物來終日體純乾流行坎止道常在玉潤蘭馨理不偏  
千載斯文一杯土詩成不覺泪潜然

哭崔左丞

高節雄才曼出羣濁涇清渭古難分十年當路多知己  
四海無人敢哭君天水有孚成雨露電雷未合失風雲  
傷心最是南歸鴈嗚咽哀音不忍聞

挽廉平章

烈似秋霜暖似春明於皎日正於神千年海嶽英靈氣  
一代乾坤柱石臣賓客填門惟慕德詩書滿架不知貧  
致君堯舜平生事天命胡為只五旬

挽張國寶總管

忠義留侯素病多此心未了鬢先皤逆流洪水潛歸海  
方命飢民許渡河善政有為無日矣哲人不永奈時何  
感君傾蓋渾如舊重把新詩忍泪歌

挽義士王千戶

億萬生靈沸鼎中當時爭敢銜英雄天樞自合長居北  
蟬螭誰教不在東袖裏有權除大惡筆頭無力寫奇功  
九原若見諸軻輩應媿斯人死至公

夜宿朝元宮贈倫講師

布衣久客厭塵腥邂逅逢君眼倍青帶酒有時歌白雪  
對花終日讀黃庭深深竹院春長好寂寂蓬門夜不扃  
吟嘯等閒天又曉滿窗風露一壇星

和雷苦齋按察韻

邂逅天涯若有期，緼袍初不羨輕肥。  
幾年浪逐人南走，指日還同鴈北飛。  
涉世已知前日錯，讀書方見後人非。  
窮途莫道無知己，魯語義經儘可依。

挽李子陽

詩酒平生不解愁，慙然天地一虛舟。  
高情肯羨黃金印，巨筆應書白玉樓。  
太華昔年留杖屨，北邙何日著松楸。  
謫僊人物今安在，不覺臨風涕泗流。

和苦齋雷按察韻

一行能令百行虧人心恒與道心違鶴鳬斷續空長短  
鵬鷖逍遙果是非灞水謾勞捫蝨手桐江誰問釣魚磯  
五湖莫道風波惡中有沙鷗自在飛

答朱鶴皋惠茶

日高夢破打門聲陽羨新茶稱客情方念鴈無千里信  
忽聞鶴在九皋鳴軒轅石鼎春雲暖漢武金盤曉露清  
方丈蓬萊在何處乘風好締玉川盟

弔李安常縣令

少學軒岐慣討論  
晚宗孔孟盛推尊  
一官自足武陵尹  
千里誰招建業魂  
衣鉢已能光祖考  
箕裘未必到兒孫  
斜陽老樹荒烟外  
踰想孤墳酹一尊

馮生名德秀字茂叔  
犯二賢名字令改之  
請詩有作

夫子常嚴器與名  
豈容辭邑請繁纓  
當時尚許從先進  
末世徒知畏後生  
衍義六經相表裏  
通書千古放光明  
西山名諱濂溪字  
於汝安時且莫更



次李御史韻

傍壘新雛翅未騰扶搖寥廓果誰能獨憐南渡耽書客  
絕勝西來面壁僧衰鬢不堪臨曉鏡畏塗何苦履春冰  
蟠胸萬卷從茲始累土終當到九層

與諸相宴西湖

湖上風烟百態新天涯客子獨傷神山禽水鳥尋常樂  
岸草汀花頃刻春好景每傷詩筆鈍芳辰莫厭酒杯頻  
殷勤細問孤山老幾度樓臺換主人

姚翰林端甫過姑蘇訪予出馮提刑壽卿所寄詩  
中間言及太常博士李鵬舉時鵬舉已不祿而壽  
卿閒居襄陽尚未知因賡其韻以寄

挈家高隱鹿門公莫逆何嘗有異同  
鴻鵠林深全晚節  
蓴鱸江冷正秋風  
五千道德言猶在  
九萬扶搖夢已空  
我不忘君君念我  
莫分漢上與吳中

題鄧山房卷後

竹映軒窗水映門  
書為朋友道為鄰  
磨開萬古虛空鏡

照破三生幻化身壺裏有方留白日世間無路避紅塵  
功成莫跨蒼鸞去常與山房作主人

用前韻

成性存存道義門西鄰禴祭勝東鄰逍遙遊外無窮景  
安樂窩中自在身我愛原思辭廩粟誰知潘岳拜車塵  
飄零海角天涯客慚愧山間林下人

程運副子充席間賦

龐眉野老髯如霜邂逅逢君引興長千里暮山開晚霽

一離寒菊破秋香從教好景撩詩思已判閒身入醉鄉  
滿坐親朋皆故里恍疑魂夢到河陽

和王宣慰韻

生平只被古書埋胃次殊無半點埃大義不愆容我拙  
老懷何惜向君開一時競造平原館千載誰登樂毅臺  
飯飽閑簾便午枕打門誰又送詩來

口占賡徐容齋韻

彈指聲中得幾何頭顱如許惜蹉跎兼金敢不明辭受

璞玉無勞教琢磨海內每傷佳士少天涯豈厭故人多  
歸來擬向滄浪上獨棹輕舟漾素波

汴梁朝元宮徐真人慶八十索賦

方瞳鶴髮地行僊四海朝元一洞天壽去期頤無遠日  
經分道德有餘年老仍掃地神公異遠涉流沙令祖賢  
況繼磐山三世業得無師授與家傳

王同知直卿父母均年八十五輒解印養親李提  
舉壽卿索賦

德形於外本於中解印歸來道更崇一行二三千載少  
雙親八十五年同至誠水火猶能蹈大孝神明豈不通  
安得人人皆盡分翕然四海一春風

懷友

時往時來莫厭頻何妨尊酒細論文鏡中白髮留春雪  
樓外青山隔暮雲碌碌無成空歎我區區相愛敢忘君  
生平只欠親朋債富貴功名百不聞

悼閻彥舉

錦繡肝腸鐵石姿九州行遍復何之  
鼃吞鯨吸千杯酒鳳起蛟騰七字詩  
竹杖打門求友日紙衣裹骨到家時  
生前死後俱漂泊想像臨風酹一卮

贈段無心處士

靈臺皎皎月輪孤勘破先天事事無  
爭向閭中呈伎倆肯從生處下工夫  
一壺天地供詩筆萬里江山入畫圖  
方念玄關何處問忽驚紫氣過三吳

題柯以善所藏合江圖卷

晴波渺渺去無聲  
桂棹蘭槳夜不停  
二水合為千頃碧  
一谿分破兩山青  
僊家此地留丹竈  
帝座當年應客星  
不與主人同一醉  
春風虛負合江亭

同王廉訪諸公養樂園宴

竹遶軒窗花滿庭  
蕙薰蘭炙有餘馨  
錦囊佳句閒中得  
金縷新聲醉後聽  
春水渡頭雙鷺白  
夕陽樓外亂山青  
聯鑣不覺歸來晚  
拂面東風酒未醒

題賈叅政雙桂堂卷



柳營蘭省一生忙心已成灰鬢已霜天上力辭三事貴  
月中連得兩枝香邀賓握槊情雖篤教子明經味更長  
萬卷傳家餘慶在桂堂應不愧槐堂

同史右丞游白石洞天留別杜南谷

軋軋肩輿入薜蘿琳宮夜飲發天和東山絲竹歡聲遠  
南谷風烟爽氣多洞裏好花濃似染世間幻景疾如梭  
新詩莫道渾無用留與幽人叩角歌

寄友生廉訪

專事威儀失太嚴少虧禮節又傷廉未酬柏府埋輪志  
徒起瓜田納履嫌古治竟為齊相沮穆生幾被楚人鉗  
黃鍾瓦缶無分別龜策徒勞鄭尹占

賈叅政席間賦

詩酒蹉跎老病身杖藜猶未出紅塵日升暘谷乾坤曉  
雪盡陰山草木春海上慣為千里客世間希見百年人  
相逢幸喜渾無事滿酌金罍莫厭頻

題祁真人畫像卷

長眉疎秀映方瞳野鶴昂藏對古松  
圮上既傳黃石畧  
山中還啟白雲封  
善人涉世恒多故  
猛虎當途不少容  
紫氣入關千載後  
乾坤能得幾猶龍

題高同知放奴詩卷

高君決意放奴時  
一寸丹心肯自欺  
但見家僮哀有母  
忍令老嫗哭無兒  
平居不作終身慊  
陰隲何須滿卷詩  
自是吾儕緣技癢  
此生未必欲人知

送李提舉壽卿北上

生平律已亦清嚴好察真如鏡出匱愉色奉親知幹蠱  
虛心接物得撓謙此風不已成忠厚他日無疑舉孝廉  
臨事勿令圭角露世人多忌莫邪鉅

艮齋詩集卷六